


SEC-IN SYNOD INKHAWMPUI THUREL A BAWHZUI

☪ Synod sum vawn dan leh endik dan tur siam thar a ni

 **Literature Week (October 10 - 16, 2011)-ah hman remtih a ni**

Mizoram Presbyterian Kohhran Synod hnuaiia Committee pawimawh, Synod Executive Committee vawi 233-na chu ruahman lawk angin February 22 - 24, 2011 chhung khan JM Lloyd Hall, Synod Office Building tharah tluang taka neih a ni a, member 138-ah 122 an kal thei. Tun tum SEC-ah hian 2010 Synod Inkhawmpuiin SEC bawhzui atana a dah thu pawimawh leh lian tak tak bawhzuia ngaihtuah a ni a. Thurel tlangpuite chu hetiang a ni:

1. Secular College din chungchanga Synod Inkhawmpui 2010 thurel, “SEC-in chak zawkin rawn um zui zel rawh se”, tih chu a lo zir chiang tur mi pathum ruat an ni a, June thlaa SEC thut hunah an zir chianna an thlen leh ang.
2. Pavalai Pawl Inkhaihruaina siam chungchanga Synod Inkhawmpui 2010 thurel bawhzui a ni baw a. Hemi chungchang lo zir chianga June 2011-a thlir tura rawtna siam tur mi pasarih ruat an ni.
3. Home Mission South huam chhung Kohhran School remchanga High School Section hawn rawtna, Synod Inkhawmpui 2010-in SEC bawhzui tura a dah chu “Synod Ramthar Board-in lo zir chiang se, SEC Committee leh-ah rawn thlen leh rawh se”, tiin an rel.
4. Biak In chhunga inchei dan tur leh awm dan mawi kaihhruaina siam chungchang Synod Inkhawmpui 2010-in SEC bawhzui tura a dah chu ngaihtuahin kaihhruaina duang tur mi pali ruat an ni a, SEC-a thlir leh tur a ni ang.
5. Bru-ho zinga rawngbawlina en that chungchang 2010 Synod Inkhawmpuiin “SEC-in lo bawhzui se, Synod-ah rawn thlen leh rawh se”, a tih chu bawhziin “Synod Ramthar Board-in hma lo la sela, SEC-ah rawn thlen leh rawh se”, tia rel a ni.
6. Shillong khawpuia Damdawi In lian, North Eastern Indira Gandhi Regional Institute of Health and Medical Science (NEIGRIHMS) bul hnaiah damlote tan Khualbuk neih rawtna, “SEC-in lo en zui rawh se” tia Synod thudah pawh ngaihtuah a ni a, hemi chungchang en zuia SEC leha an hmuh dan thlen leh tur mi pang an ruat.
7. Synod Inkhawmpui 2009 (Gen.1)-in ‘Synod sum vawn dan leh endik dan tur fel zawka siam’ tura tih, Synod 2010 (Gen.63)-a chhawp chhuah, ‘SEC-in hman nghal theih turin lo zut mam rawh se’ tia thu dah chu uluk taka thlir ho a ni a; siam that ngaite siam thain hman nghal theih tura pawm a ni.
8. Zawlaidi chungchanga Synod Inkhawmpui thu, ‘Grape wine hi ‘Zu’ a ni a, zu ni lo tura alcohol content tihnam turin sawrkar ngen ni se, SEC-in a tul angin lo bawhzui se,’ tih chu ngaihtuah a ni baw a. “Synod Officers’ Meeting-in a tul angin lo bawhzui rawh se,” tia rel a ni.
9. Probationary Pastor lak dan en that thua Synod Inkhawmpui thurel bawhziin SEC thlir leh tura ruahmanna siam tur mi 10 an ruat.
10. ‘Synod Pêm Hruai Dan leh Zin Man’ en that tura Synod Inkhawmpuiin a tih angin ruahmanna siam tur mi pathum ruat an ni a, an ruahmanna pawh thlir nghal a ni baw a, hman nghal theih tura pawm a ni.
11. Kohhran Hmeichhe Inkaihhruaina zuiin Kohhran Hmeichhe Inkhawmpui Lian Chairman atan Pi Laltnanmawii, Chandmari ruat a ni a; General Secretary atan Pi H. Lalpianthangi, Asst. Co-ordinator, Synod Office chu ruat a ni baw.
12. Synod Literature & Publication Board Executive Committee dil angin Kristian Tlangau kum 100 tlin denchhenin October 10 - 16, 2011 chhung Kohhran tina Literature week hman remtih a ni.
13. Garo leh Rabha hnam intihbuaina tuartute tanpuina tur sum thawh tura PCI Senior Administrative Secretary hnen atanga ngenna dawn angin Rs. 30,000/- pek tura tih a ni.



Editorial Staff

Rev. Thangzauva Upa H. Ronghaka
Rev. B. Lalngkhliana
Upa C.H. Thangkhuma

Khawvel hmasawna chak taka lo tlan pur pur hian kan ni tin nun leh khawsak phung pawh a tidanglam nasa hle a. Heng hmasawna lo thlenghian inchiiah ve emaw, dodal emaw ngawt chu a rem lohna chin a awm thei ang. Hmasawnnain thil tha lo a ken tel a awm chuan hnawla, a tha lo lai apiang siamtha a, kan ni tin nun leh khawsakna atana tangkai tur erawh chu hman tangkai thiam a tha hle ang. Zawnei Jeremia hnena Pathian Thuchah hi hre thar leh ila:

“En teh, hnamte leh lal ram chungah te - pawt chhuak tur te, thiat tur te, tichhe tur te, paih thla tur te, siam tha tur leh din turin hemi niah hian ka dah che a ni,” (Jer.1:10)

CHATUAN CHAWLHNAAH

† **Rev. S. Lalhluma** (kum 80) s/o Thanchhuma Sailo, Republic Veng chuan hun eng emaw chen thluak leh hriatna thazam kaihnawih natna (*Parkinson's disease*) a tawrh hnuin March 1, 2011 zing dar 3:50 khan chatuan ramah min chawlhan ta. Hemi ni vek hian Sr. Executive Secretary Rev. Vanlalzuatan a vui.

Rev. S. Lalhluma hian Synod hnuaiia hun pum rawngbawl hna chu kum 1960 a tanga 1993 chung a thawk. Pro Pastor-in Phuldungseiah a rawngbawl na bul a tan a. W. Phaileng, Sateek, Khawbung 'S', Kawlkulh leh Zemabawk Bialahte Pastor hna thawkin a lo awm tawh a, 1994-ah Pastor hna a tanga pension-in a chawl ta a; Republic Vengah hian a inbengbel zui ta a ni.

† **Rev. Thangdela** (kum 67) s/o Upa Rokunga (L) Mission Veng pawhin March 7, 2011 chhun dar 11:10 khan hun eng emaw chen cancer natna avanga a inenkawl hnuin chatuan ramah min pansan ta. A tukah Synod Moderator Rev. C. Lalsanglian a vui.

Rev. Thangdela hi Synod hnuaiia Pastor hnaah 1974 a tanga thawkin Pro Pastor a nih laiin Khawhai, Dawrpui leh SMB Office-ah te a awmin nemngheh a nih hnuin SMB Office-ah kum kum li a awm zui a; Saitual, Noagang, Republic leh Electric Veng Bialahte Pastor-in a lo awm tawh a, Tripura Mission Field Secretary leh Civil Hospital Chaplain-ah te a lo awm tawh bawk. Central K.T.P Leader (1996-'98), Synod Secretary (1998-'99) leh Synod Moderator (2004) a lo ni tawh a. 2005-a pension hnuin Thlarau Bo Zawngtute rawngbawl na hmun, Madhya Pradesh-ah Field Director hna a thawk leh a, he rawngbawl hnaah hian a hun tawp a hman ta a ni.

Lusun chungte tan Pathian thlamuanna kan duhsak hle. Kohhranhoten i tawngtaipui ang u — **Editorial Staff**

**KOHRAN HMEICHHE INKHAWMPUI LIAN
VAWI 44-NA A HLIMAWM E**

Ruahman lawk angin Mizoram Presbyterian Kohhran Hmeichhe Inkhawmpui Lian vawi 44-na chu March 3 - 6, 2011 chung khan Kawnpui Bialin hneh takin an thleng a, Inkhawmpui hmanga riaka kal, a thlengtun lamin an chhinchhiah chin chu mi 4153 an ni. Heng bakah hian an khaw thenawm leh Aizawl a tanga lehlanga kal thahnem tham tak an awm bawk.

Inkhawmpui rorelnaah rorel palai 386 an kal a; “*Presbyterian Church of India hnuaiia hian hmeichhia, Theology degree nei, a awm leh phute chu Pastor/Minister atan nemngheh (ordain) ni ve rawh se*”, tih leh ‘*Bial Buhfaiham Ziaktu tan hun chung (term) hian Bial Kohhran Hmeichhe term zui tawh lovin Pastor Bial Inkhawmpui Puipate term zui se*’ tihte chu Synod Executive Committee-a thlen remtih a ni. *Bial Kohhran Hmeichhe Inkhawmpui hun rualkhai deuhva hman tha an ti a; Women Centre Special Budget siam tha an ti baw a, hengte hi Central Committee bawhzui turin an dah thung. Kum 2011-2012 chung a budget ruahman Rs.26,45,000/- chu lungrual takin an pawm.*

Inkhawmpui Thupui ‘**Kristian Chhungkua**’ (Joshua 24:15) tih chu Ni Zohmangaihi, Secretary for Women’s Relations, PWF, PCI te, Pi C. Lalmangaihi, Treasurer, Central Kohhran Hmeichhia te leh Pi C. Lalthanzauvi, Central Committee member-ten an sawi a. Thu zir tura thlan, II Timothea chu Pi P.C. Lalrani, Librarian, ATC-in a zirtir.

He Inkhawmpui hian Mizoram Presbyterian Kohhran Hmeichhe Inkhawmpui Lian hman tan a nih a tanga kum 50 tlinna (Golden Jubilee) lawm a ni a, hemi pual hian Souvenir (lekhhabu) siam a ni a; hun bik, Golden Jubilee lawmna inkhawm, March 5, 2011 (Inrinni) chawhmaah ropui taka hman a ni bawk. He hunah hian Pi Lalzawmliani, Ex-Vice Chairman-in thuchah a sawi a, Mizoram Presbyterian Kohhran Synod Moderator-in Jubilee thilpek hlanna hun a hman. Aizawl khawpui Bial infin Zaipawlpuin “*Jerusalem ka in ropui*” tih hla an rem baw a, a ngaihnaawm hle.

Kohhran Hmeichhe Inkhawmpui Lian hruaitu thlan/ruat tharte hetiang a ni:

Chairman : Pi Lalranmawii, Chanmari (SEC ruat)
Vice Chairman : Pi Khawlvuani, Hlimen Bial
Gen. Secretary : Pi H. Lalpianthangi (SEC ruat)
Asst. Secretary : Pi Laldawnkimi, Ramhlun Bial
Treasurer : Pi Lalsawmliani, Bawngkawn Bial
Finance Secy. : Pi Liankimi, Mission Veng Bial

Nakkum 2012 khi Inkhawmpui Lian neih loh kum a ni a, Rorel Inkhawm Tlangnuam Kohhran Biak In, Aizawlah neih a ni thung ang. A thlengtun, Kawnpui Bial an tawngtute thla hle a, palaite an hlim tlang hlea hriat a ni.



Râl Vêngtu hnena thian dun lo kalte chuan a hnênah, “Râl Vêngtu, Thlarau dik leh dik lo hriat dan awlsam tak i hriat ngei kan ring a, min hrilh ta che,” an ti a. Râl Vêngtu chuan heng thute hi a lo hrilh a:

1. Lal Isuan, “Thlamuang takin awm rawh u...” a tih laia hlah nei reng mai te hi chuan thlarau dik tak chu an chang lo phawt mai a.

2. Ringtu awm tha hle hle lai tihdarh tuma vir rengho hi chuan ringtute pumkhatna tura dilsaktu Isua Krista leh a Pa Thlarau chu an nei lo bawk a.

3. Thlarau dik lo changte chuan Pa chauh hriat - Isua lo kal lehna leh khawvel tawp hun an bihtliah thîn. An thu hrilh lâwk a dik lo thîn.

4. Thlarau dik lo changte chu an intirau va, anmahni zuituten an hlau thîn. An rahah in hre mai ang.

**SYNOD EXECUTIVE SECRETARY-TE
HNA CHANPUAL**

Synod Executive Committee vawi 233-na chuan Synod Executive Secretary-te hna chanpual hetiang hian a siam thar:

A. Rev. Vanlazuata, Senior Executive Secretary

- | | |
|---------------------------|-----------------------------|
| 1) Pastoral | 2) Finance |
| 3) General Administration | 4) Communication |
| 5) SL&PB | 6) Pension & Provident Fund |
| 7) Service Board | 8) Worship |
| 9) Endowment Fund | 10) Manipur Area |
| 11) Tul dang apiang | |

B. Rev Zosangliana Colney, Executive Secretary

- | | |
|----------------------------------|--------------------------|
| 1) Sunday School | 2) Theological Education |
| 3) Education | 4) Hospital |
| 5) Property | 6) Revival |
| 7) Nupa Thu | 8) Research & Evaluation |
| 9) K.T.P. | 10) Archives |
| 11) Presbyterian Hmeichhe Hostel | |

C. Rev. Lalzuithanga, Executive Secretary

- | | |
|------------------------------|----------------------------|
| 1) Ramthar | 2) Music |
| 3) Social Front | 4) Information & Publicity |
| 5) Presbyterian Bible School | 6) Partnership |
| 7) SMTc | 8) FG & CC |
| 9) Kohhran Hmeichhia | 10) Hmangaihna In |

Note: Rampawn & Sawrkar dawrna chu E.S. ten anmahni Portfolio theuh chungah a tul angin an kalpui thîn ang a. Executive Secretary pahnihte chuan an dawr lehkha Copy chu Senior Executive Secretary hnena an pe thîn ang.

**PRESBYTERIAN HOSPITAL, DURTLANG
FEBRUARY, 2011 CHHUNGA THILPEK DAWNTE**

I. CHARITY FUND

1. KTP, Durtlang Pastor Bial	Rs. 5,000.00
2. Sesawng Pastor Bial	Rs. 3,000.00
3. Presbyterian Kohhran, Sesawng	Rs. 2,000.00
4. Keitum Pastor Bial Kohhran Hmeichhia	Rs. 2,000.00
5. KTP, Rangvamual Branch	Rs. 1,000.00
6. Ngopa 'N' Kohhran	Rs. 2,250.00
7. Ngopa Presbyterian Kohhran	Rs. 4,000.00
8. Hming thup	Rs. 1,000.00
TOTAL	Rs. 20,250.00

II. THISEN PETE

	Pek zât
1. KTP, Khatla South Branch	52 Units
2. KTP, Sateek Branch	22 Units
3. KTP, Chhinga Veng East Branch	28 Units
4. West Phaileng Joint YMA	76 Units
5. KTP, Saitual & Saitual Hmar Veng Branch	70 Units
6. Presbyterian Hospital Staff & Student Nurse-te (Valentines Day pualin)	85 Units
7. KTP, Bethlehem Branch	50 Units
8. KTP, Thingsul Tlangnuam Branch	37 Units
9. KTP, Tlangnuam Branch	48 Units
10. KTP, Darlung Branch	46 Units
TOTAL	514 Units

III THIL DANG

1. Rebecca Drug Centre, Zarkawt, Aizawl - Refrigerator 1 & Table Fan 1
2. Lungdai Pastor Bial KTP - Plastic chair 10 nos.

Thilpek min petute zawng zawng chungah Pathian hmingin lawmthu kan sawi tak meuh meuh a ni.

Sd/-
(Rev C. LALBIAKHLUNA)
Chaplain,
Presbyterian Hospital.

SYNOD PRESS-AH KHAWL THAR

Synod Press-in lehkha thlehna khâwl (Ratan Paper Folding Machine F-3 model) a lei thar chu March 7, 2011 zing dâr 9:30 khan Rev. Lalzuithanga, Synod Executive Secretary-in Pathian hnenah a hlan. Hlanna inkhawm hi Upa F. Lalsangliana, General Manager, Prescom-in kaihruiin khâwl thar chungchang leh tuna an khâwl neih mek dangte chanchin a sawi a. Khâwl man ngau ngau hi chu Rs.4,75,000/- a ni a, a phurh manah hian Rs.80,651/- sên belh a nih bakah installation charge (engineering fee) atan Rs.7,000/- sên a ni bawk a; tichuan khâwl man atana sênso zawng zawng chu Rs.5,62,651/- a ni.

He khâwl hian lehkha phêk hlai (ni tin chanchinbu ang) a thlep thei a, Darkar khatah lehkha phêk 5,000 a thlep zo thei a, mihring kuta thleh a nih hian mi pakhatin ni khatah 2,000 a thlep thei taww vel a ni.



Falkawn Centenary Kohhran (Muallungthu) chu nikum October 3, 2010 khan Kulikawn Branch KTP member 130 velin an tlawh a, Pathian hminga inpawlhona hlimawm tak an neih theih bâkah Kulikawn Branch KTP hian thuziak mawi tak (Citation) te, Computer set te an pe a; Kulikawn KTP te senso hian zanriah tuihnai tak kil ho a ni bawk a; heng avang hian Kohhranho an lawm tak meuh tih thu Kohhran Ziaktu hnen ațangin kan dawng.

M. Kawnpui Kohhran chuan January 15-30, 2011 chhung khan Synod Revival Speaker Pu C. Lalenga, *Hunter For Christ Team* ruaiin Camping chhawng hnih an buatsaih a. Kohhran dang ațang pawhin eng emaw zat an lut a, Biak In thleng phak loten harhtharna an chang a, Kohhran boruak a nawm pah hle.

Sailulak Kohhran chuan Pu C. Sapchhawna, Remna Palai Team Speaker-a hmangin January 26 - February 16, 2011 chhung khan Crusade an buatsaih a; Kohhranhoten Thlarau lam harhna an chang nasa hle a, tisa damna chang pawh mi thahnem tak an awm a, damna chang zingah Kohhran pawl dang mite pawh eng emaw zat an awm. Tisa leh Thlarau damna changte avangin he rawngbawlina hi khawtlang leh Kohhranhoin hlawkpui an inti hle.

SAWMNA

Vaphai Presbyterian Kohhran chuan April 2, 2011 hian Biak In thar hawn an tum a. Vaphai Kohhrana lo lawi tawh zawng zawngte he hun hmanpui tur hian an sawm.

SYNOD HSS ADMISSION

Synod Higher Secondary School-ah Class XI (Sc. & Arts) Admission duh tan HSLC Board Exam result chhuah veleh ngaihven tur a ni.

Sd/-
Principal
Synod HSS.

HOSPITAL TAN THILPEK LAWMAWM

South Wales ațanga lo kal Mr. & Mrs. Goronwuy Bennet Williams, Llandudno leh Bury Green-te chuan Presbyterian Hospital, Durtlang hnuaiia HIV⁺/AIDS veite enkawlina Grace Home-a hman turin mihring taksa/thisena natna dotu tlem leh tam dan enna CD4 counting machine, cheng nuai 12 man vel zet chu February 26, 2011 khan Hospital hotute kutah an hlan.

He khawl hi AIDS veiten damdawia enkawlina an mamawh dan leh an thatpui ngei tura enkawl an nih dan tur hriat theihna atana pawimawh tak a ni a; a khawl petu tarlante bakah khian Pu Zolawman (Rev. Anuerin Owen) hemi atan hian sum leh pai, tha leh zung a sêng nasa hle niin thu kan dawng.

KRISTIAN CHHUNGKAW FILM INCHANSIAK RESULT

Family Guidance & Counselling Centre (FG&CC) buatsaiha nikum 2010-a Kristian Chhngkaw Film inchansiak endikna (*result*) chu February, 25, 2011 khan Pi Zaii Hall, Synod Conference Centre-ah puan a ni. Kohhran 19-in an film chante an theh lut a, he intihsiaknaa tel Kohhrante leh an lemchan (*film*) hmingte chu hetiang a ni:

RANK	KOHRAN HMING	FILM HMING
Pakhatna	Dinthar	<i>Nun Krista</i>
Pahnihna	Chanmari	<i>Zuala leh Zuala</i>
Pathumna	Khatla	<i>Awmpui Rûn</i>
Palina	Chaltlang Lily Veng	<i>Ka IDOL</i>
Pangana	Ramhlun Venglai	<i>Vanram</i>
Parukna	East Lungdar	<i>Ka Ngaidam Che</i>
Pasarihna	Dawrpui Vengthar	<i>Bul Tanna Dik</i>
Pariatna	Bawngkawn	<i>Tlai Luat A Awm Lo</i>
Pakuana	Mission Veng	<i>Beiseina Nung</i>
10-na	Tuikual North	<i>Min Ensan Suh</i>

Participation Prizes dawngte

1. Ramthar Veng	<i>In Hniakhnung Ka Rawn Zui</i>
2. Bungkawn	<i>Duhthlanna Sang Ber</i>
3. Tlangnuam	<i>Khawiah Pawh Isua Nen</i>
4. Model Veng	<i>Mika 6:8</i>
5. Ramhlun North	<i>Thinlung Lal</i>
6. Republic Vengthlang	<i>Intiamna Rinawm</i>
7. I.T.I Veng	<i>Hlimna Thuruk</i>
8. Khawzawl Chhimveng	<i>Dikna Hi A Tlo</i>
9. Khawbung	<i>A Laiah Isua</i>

Lawmman tangkafai, pakhatnain Rs.50,000/-, pahnihnain Rs.30,000/-, pathumnain Rs.20,000/- an dawng a, a dang zawng chuan Rs.3,000/- an dawng a, an vai hian Chawimawina Thuziak an dawng theuh bawk.

Result puan leh lawmman sem Inkhawm hi Rev. Vanlalzuata Senior Executive Secretary-in a kaihhruai a, Rev. Zothansanga, Director, FG&CC-in intihsiak buatsaih a nih chhan leh endik dan te sawiin a tel Kohhrante hnenah leh kal khawmte hnenah lawmthu a sawi a. Mizoram Synod Choir-in zaia rawngbawlina an neih hnuin Synod Moderator Rev. C. Lalsanglianang ațangtaian Pathian hnenah *film* theh luh zawng zawngte chu a hlan a ni.

Result puan leh lawmman sem Inkhawm hi Synfo leh Zonet țang kawpin Zonet Zawlbûk channel-ah *live*-in an tichhuak a. Synfo hian a tha 10 (Top 10)-te lemchan hi video (DVD)-a en theih turin an siam a, TV lama en theih turin an pe bawk a, țalaiten an en nasa hle.